

## Irigografija

- **Šta je irigografija?**

Irigografija je radiološka dijagnostička pretraga koja se koristi za ispitivanje oboljenja debelog crijeva.

Pri ovoj pretrazi koristi se rendgensko zračenje, a pacijentu se radi boljeg prikazivanja struktura debelog crijeva rektalno daje kontrastno sredstvo (barijumsko ili jodno).

Spada u neinvazivne i bezbolne pretrage, ali kod pacijenta može izazvati osjećaj nelagode i neprijatnosti.

- **Da li postoji rizik po pacijenta?**

Doza zračenja kojoj je pacijent izložen u toku ovog pregleda zavisi od dužine trajanja pregleda i višestruko je veća nego pri standardnom RTG-snimanju.

Obavezno upozoriti ljekara o mogućoj trudnoći, jer primjena zračenja u trudnoći može štetiti plodu. Ako planirate trudnoću, najbolje bi bilo obaviti pregled u prvih 10 dana menstrualnog ciklusa da bi se izbjeglo štetno dejstvo zračenja na eventualno početnu trudnoću.

Takođe je moguća pojava alergijskih reakcija na kontrastno sredstvo.

- **Kako se pripremiti za pregled?**

Da bi se ova pretraga uspješno izvršila, neophodno je da ispitivani dio debelog crijeva bude potpuno ispražnjen. Stoga ste prije dolaska na pregled dužni obaviti odgovarajuću pripremu, koja se sastoji od sljedećeg:

- 2 dana prije pregleda uzimajte laganu i lako svarljivu hranu (tjestenina, palenta, kuvano bezmasno meso).
- Istovremeno uzimajte 3x2 tablete DULCOLACS-a.
- Dan prije pregleda popijte COLOCLENS-sirup.
- UJUTRO NA PREGLED OBAVEZNO DOĐITE NATAŠTE!
- Na pregled ponijeti važeću uputnicu i prethodnu medicinsku dokumentaciju (pisane i slikovne nalaze).

Ukoliko niste adekvatno pripremljeni, pregled se neće obaviti!

### **Tok pregleda**

Na dan zakazanog termina za pregled, javljate se sa uputnicom na šalter Kabineta za klasičnu radiologiju, poželjno 30 minuta ranije.

Kad dođete na red za pregled, rendgen tehničar će Vas prozvati, uvesti u kabinu za presvlačenje i detaljno objasniti način izvođenja pretrage. Potom će Vas uvesti u snimaonu gdje nadležni ljekar-radiolog pregleda Vašu prethodnu medicinsku dokumentaciju i postavlja nekoliko pitanja o tegobama koje su Vas dovele na pregled.

Za vrijeme ovog pregleda ležite na pokretnom stolu rendgenskog aparata. Rendgen tehničar će Vam rektalno postaviti gumenu cjevčicu, kroz koju ubrizgava kontrastno sredstvo u debelo crijevo. Ovaj postupak je bezbolan, ali kod Vas može izazvati osjećaj neprijatnosti.

Za vrijeme trajanja pretrage, radiolog i rendgen tehničar su u susjednoj prostoriji, iz koje se nadgleda tok pregleda kroz staklo i putem interfona daje usmena uputstva kojih se morate pridržavati (npr. „Okrenite se na lijevi bok!“, „Zadržite dah!“ i slično).

Za pregled se koristi rendgensko zračenje, a snimci se dokumentuju na rendgenskom filmu.

- **Šta se dešava nakon pregleda?**

Poslije obavljenog pregleda, rendgen tehničar/sestra Vam pomaže da ustanete sa stola i uvodi Vas u prostoriju gdje ćete putem stolice izbaciti ubrizgani kontrast.

Nakon pregleda ne postoje nikakva posebna ograničenja u ishrani i ponašanju kojih se morate pridržavati.

- **Kako preuzeti ljeakarski nalaz?**

Radiološki izvještaj/nalaz pacijent preuzima na šalteru Kabineta za klasičnu radiologiju nakon što radiolog interpretira nalaz.